

Ĉu al la kvara Imperio germana ?
verkita de *Éric Bernard COFFINET*
je la 01a de januaro 2026

Antonio GRAMSCI (1891-1937) skribis ke, "mortiĝanta estas la malnova mondo, malfrue naskiĝanta estas la nova mondo kaj en tiu duonlumo ekaperas monstroj". Kaj li aldonis ke, "la krizo estas momento kiam la malnova mondkordo svenas kaj kiam la nova devas sin trudi spite al ĉiuj kontraŭstaroj kaj kontraŭdiroj. En tiu fazo de transiro okazas ja multaj eraroj kaj turmentoj". Nun en kriza tempo, ĉu oni devas timi aperon de kvara Imperio germana ?

La unua Imperio (*Reich* : Rajŝ') estis la Sankt-Imperio romana germana (962-1806) kun jam ekde la dekdua jarcento la germana koloniado de la orienta Eŭropo (*drang nach osten* : impeto al oriento). La venkoj de la unua Imperio franca de Napoleono la Unua kaŭzis ĝian malaperon.

La dua Imperio germana (1871-1918) fondiĝis la 18an de januaro 1871 per unuiĝo de la germanaj Ŝtatoj ĉirkaŭ Prusio post ĝia venko kontraŭ la dua Imperio franca de Napoleono la Tria. Ĝia agresema politiko industria kaj tutgermanisma al la orienta Eŭropo, kie jam vivis grandaj komunumoj germanaj, estis unu el la kaŭzoj de la unua mondmilito. Per la packontrakto de *Brest-Litovsk* subskribita la 3an de marto 1918 la bolŝevisma Rusio portempe fordonis vastajn teritoriojn deziritajn, kiuj nuntempe estas ukrainaj, belarusaj, polaj, baltaj aŭ eĉ finlandaj.

Post la armistiko je la 11a de novembro 1918 Francio volis dispecigon de tiu germana Imperio, same kiel estis dispecigitaj la imperioj aŭstra-hungara kaj otomana, por definitive malfortigi ĝin. Tion malkonsentis la potencoj britaj-usonaj, kiuj helpadis la germanajn industriojn kaj poste favoris la naziismon por lukti kontraŭ Unuiĝo de Sovetaj Socialismaj Respublikoj (U.S.S.R). Dank'al ili kaj spite al la kondiĉoj armisticaj tiu tria Imperio germana (1933-1945) povis sin fortege rearmigi, reakiri la regionon de Rejnlando, kaj daŭrigi sian tutgermanisman disvolviĝon per invado unue de Aŭstrio, poste de la ĉeĥaj Sudetoj kaj fine de la okcidenta Pollando, kiu estis kaŭzo de la dua mondmilito. La provo disvolviĝi plu orienten laŭ Ĝenerala plano por Oriento (*Generalplan Ost*) per milito kontraŭ U.S.S.R fine kaŭzis ĝian plenan malsukceson kaj dispecigon de Germanio al du landoj regitaj de la venkintoj.

La "sennaziismigo" de okcidenta Germanio fakte limiĝis je la proceso de Nurenbergo kaj kelkaj "procesoj sekvintaj", dum kiuj nur ĉirkaŭ dekmil homoj estis kondamnitaj ! La potencoj britaj-usonaj enoficigis eks-naziistojn subigitajn al ili ĉe ĉiuj niveloj de Federacia Respublika Germanio (F.R.G) kaj de Nord-Atlantika Traktat-Organizo (N.A.T.O) ambaŭ fonditaj en 1949 por daŭrigi sian "malvarman militon" kontraŭ U.S.S.R-o kaj ties satelitaj landoj komunistaj. Same okazis por Eŭropo konstruita kiel usona kolonio kaj kies unua prezidanto de la eŭropa Komisiono, *Walter HALLSTEIN* (1901-1982), estis komisiita en 1938 de Hitlero por starigi la jurajn bazojn de "nova Eŭropo" regota de Germanio ! Nenio do ŝanĝiĝis en la germanaj regad-retoj subtenataj de Usono fronte al komunismo...

Laŭ la kondiĉoj de la kontrakto subskribita en Moskvo je la 12a de septembro 1990 por la renuiĝo de siaj partoj okcidenta kaj orienta, Germanio devas agnoski la landlimojn difinitajn post la dua mondmilito kaj kondukti laŭ pacema politiko kun malgranda armeo sen armiloj nukleaj, biologiaj aŭ kemiaj. Ankaŭ oni parole promesis al Rusio ke N.A.T.O ne plu disvatiĝos orienten. Germanio fine reakiris sian unuecon, sian potencon kaj sian influon en Eŭropo dank'al la protekto de la "usona ŝildo", abunda rusa gazo malmultekosta kaj

komuna monunuo favoraj al siaj industrioj.

Sed ĉio subite ŝanĝiĝis post la neatendita malvenko de Usono kaj N.A.T.O kontraŭ Rusio en Ukrainio. Post kiam Usono detruigis la gasodukton *Nord Stream* kaj trudis al Eŭropo malsaĝajn punojn komercajn kontraŭ Rusio, ĝi nun volas forlasi la batalkampon eŭropan por alfronti Ĉinion. Sekve usona protekto por Eŭropo ne plu estas certa, rusa fonto de gaso malmultekosta elsekiĝis, sennombraj homvivoj kaj gigantaj monsumoj estis vane malŝparitaj, grave malsaniĝas la germanaj industrioj kun komuna monunuo eŭropa ne plu tiom favora. La servantoj de la granda kapitalismo internacia kaj de la tradiciaj elitoj germanaj, kiel *Friedrich MERZ* kaj *Ursula VON DER LEYEN*, propagandas por grandskala rearmiĝo de Eŭropo en etoso pli kaj pli maldemokrata kaj malrusema por ke Germanio konservu sian influon. Eĉ nun laŭtiĝas voĉoj germanaj, kiuj aŭdacas kritiki la landlimojn difinitajn post la dua mondmilito kaj peti kompensojn por la tiamaj elmigrintoj germanaj.

Ĉu Germanio baldaŭ eksplodigos Eŭropan Union kaj ĝian komunan monunuon, kiuj nun ne plu certigas pacon nek prosperon promesitajn ? Ĉu ĝi starigos "kvaran Imperion germanan" por superregi centran kaj orientan Eŭropon ? Mi opinias ke vere estus timenda tiu "kvara Imperio" de Germanio denove unuiĝinta, militarisma, revenĝema kaj rifuzanta lerni el la pasinteco...